

Кузатув кенгашининг
2020 йил 19 майдаги 2 - сон баёнига
1-илова

**Академик Т.А.Саримсоқов номидаги стипендиясига номзодларни
саралаш ва ғолибларга стипендия ажратиш тартиби тўғрисидаги
НИЗОМ**

1-боб. Умумий қоидалар

1. Ушбу Низом Ўзбекистон Республикаси Президентининг “Математика соҳасидаги таълим сифатини ошириш ва илмий-тадқиқотларни ривожлантириш чора-тадбирлари тўғрисида” 2020 йил 7 майдаги ПҚ-4708-сон қарорига мувофиқ Математика таълим йўналишларида таълим олаётган талабалар ва тадқиқотчилар учун Академик Т.А.Саримсоқов номидаги стипендиясига (кейинги ўринларда – стипендия) номзодларни саралаш ва стипендия ажратиш тартибини белгилайди.

2. Стипендия Академик Т.А.Саримсоқов номидаги стипендиясига номзодларни саралаш бўйича танлов комиссиясининг (кейинги ўринларда – танлов комиссияси) ҳулосасига кўра Математика фани ва таълимни ривожлантиришни қўллаб-қувватлаш жамғармаси Кузатув кенгашининг (кейинги ўринларда – Кузатув кенгаши) қарорига мувофиқ ажратилади.

3. Стипендия республикадаги олий таълим муассасаларида Математика таълим йўналишларида 2-курсни тугатган бакалаврият, 1-курсни тугатган магистратура талабалари ва 1-босқични тугатган таянч докторантлар учун ушбу Низом билан белгиланган тартибга мувофиқ танловдан ўтганларга берилади.

4. Танловдан муваффақиятли ўтганлар Академик Т.А.Саримсоқов номидаги стипендиянинг стипендиати (кейинги ўринларда – стипендиат) ҳисобланади ва улар тегишли Сертификат билан тақдирланади.

5. Стипендиатларга Кузатув кенгашининг қарори билан белгиланган миқдорда бир ўқув йили мобайнида ҳар ой учун ўрнатилган тартибда стипендия тўланади.

6. Танловни ўтказиш ва стипендияни тўлаш билан боғлиқ харажатлар Математика фани ва таълимни ривожлантиришни қўллаб-қувватлаш жамғармаси (кейинги ўринларда – Жамғарма) маблағлари ҳисобидан амалга оширилади.

7. Ушбу стипендия номдор давлат стипендиялари билан бир вақтда берилмайди.

2-боб. Танловда қатнашиш учун талабгорларга қўйиладиган асосий талаблар

8. Танловда қатнашиш учун талабгорлар қуйидагиларга мувофиқ бўлиши лозим:

а) Бакалавриат ва магистратура талабалари:

ўқув йили натижалари бўйича фанларни ўзлаштириш даражаси яхши (4 баҳо) ва ундан юқори бўлиши;

математика бўйича барча фанларни ўзлаштириш даражаси аъло (5 баҳо) бўлиши;

б) таянч докторантура изланувчилари:

малакавий имтихонларни топширганлиги, бунда мутахассислиги бўйича малакавий имтихон 86 балл ва ундан юқори бўлиши;

якка тартибдаги режаси бўйича белгиланган ишларнинг ўз вақтида бажарилганлиги.

3-боб. Танловга ҳужжатларни қабул қилиш

9. Жамғарма фаолиятини ташкил этиш бўйича Ижро дирекцияси (кейинги ўринларда – Ижро дирекцияси) Кузатув Кенгашининг қарорига кўра стипендия бўйича танловга ҳужжатларни қабул қилиш бошланганлигини, ҳужжатларни қабул қилиш муддатлари ва тартибини республика оммавий ахборот воситаларида стипендия бериладиган йилнинг 1 июнгача эълон қилади.

10. Стипендияга талабгорларнинг аризалари ва тегишли ҳужжатлари оммавий ахборот воситаларида эълон чиққан кундан бошлаб:

Бакалавриат ва магистратура талабаларидан 30 июнга қадар;

докторантлардан 1 ноябрга қадар қабул қилинади.

11. Танловда қатнашиш учун Ижро дирекциясига стипендияга талабгорнинг аризаси қуйидаги ҳужжатларни жилдлаган ҳолда тақдим этилади:

а) бакалавриат ва магистратура талабалари томонидан:

номзоднинг синов дафтарчасидан кўчирма (кўчирма факультет мухри билан тасдиқланади);

тегишли факультет декани ёки кафедра мудири ва таълим муассасадаги етакчи профессор-ўқитувчисининг тавсияномаси (талабгорнинг илмий натижалари қисқача баён этилган ҳолда);

илмий конференция ва семинарларда иштирок этган маъруза тезис/мақолалари, илмий журналларда чоп этилган илмий мақолалари рўйхати (факультет мухри билан тасдиқланди) ва нусхаси;

б) таянч докторантура изланувчиси томонидан:

илмий раҳбари тавсияномаси (бунда талабгорнинг диссертация иши бўйича олинган илмий натижаларининг қисқача баёни бўлиши назарда тутилган);

илмий конференция ва семинарларда иштирок этган маъруза тезис/мақолалари, илмий журналларда чоп этилган илмий мақолалари рўйхати ва нусхаси;

CV-Curriculum Vitae (халқаро стандартларга мувофиқ шаклда).

12. Танловда қатнашиш учун ҳужжатлар аслининг электрон нусхаси Ижро дирекциясининг mathscholar@mathinst.uz электрон почтасига юборилади.

13. Танловга қуйидаги талабгорларнинг ҳужжатлари қабул қилинмайди:

таълим олаётган ташкилотининг талабгор бўйича унинг таълим жараёнида ўзлаштириш ва тарбияси бўйича эътирози бўлганида;

ушбу Низомга мувофиқ аввалги танловларда стипендиат бўлганлар (таълим тури ўзгарган ҳолларда бундан мустасно).

14. Талабгорларнинг ҳужжатлари Жамғарма фаолиятини ташкил этиш бўйича Ижро дирекцияси томонидан қабул қилинади.

4-боб. Танловга тақдим этилган ҳужжатларни кўриб чиқиш

15. Танловда қатнашиш учун тақдим этилган ҳужжатлар танлов муддати тугагач бир ҳафта муддатда Танлов комиссиясига тақдим этилади.

16. Танлов комиссиясининг қарори билан ҳужжатларни кўриб чиқиш учун экспертлар белгиланади.

Экспертлар Танлов комиссияси аъзолари ва Институт ходимлари ёки зарур ҳолларда бошқа ташкилотлардан жалб этилаётган экспертларнинг розилиги билан тайинланиши мумкин.

17. Танловда қатнашиш учун тақдим этилган ҳужжатлар икки ҳафта муддатда эксперт томонидан ўрганилади ва ўрганиш натижалари бўйича экспертнинг хулосаси Танлов комиссиясига тақдим этилади.

18. Эксперт хулосасида қуйидагилар баён этилиши зарур:
танловга тақдим этилган ҳужжатлар Низом талабларига мослиги;
талабгорни Стипендияга тавсия этиш бўйича хулосаси.

19. Танловга тақдим этилган ҳужжатлар бўйича ўрнатилган тартибда эксперт хулосаси тақдим этилган тақдирда талабгор ҳужжатлари Танлов комиссиясининг йиғилишида кўриб чиқилади.

20. Танлов комиссияси йиғилиши унинг аъзоларидан камида учдан икки қисми иштирок этганда ўтказилиши мумкин.

21. Танлов комиссияси йиғилишларида эксперт хулосаси тақдим этилган ишлар бўйича талабгорларнинг ҳужжатлари талабгорларни таклиф этилган ҳолда муҳокама қилинади.

22. Танлов комиссиясининг қарори оддий овоз йўли билан кўпчилик овозга кўра қабул қилинади ва баён шаклида расийлаштирилади.

23. Танловда қатнашиш учун тақдим этилган ҳужжатлар Танлов комиссияси томонидан танлов эълон қилинган йилда:

бакалаврият ва магистратура талабалари бўйича – 20 июлга қадар;

таянч докторантура изланувчилари бўйича – 20 ноябрга қадар кўриб чиқилади.

24. Танлов яқунлари бўйича Танлов комиссияси томонидан кўриб чиқилган ва стипендия тавсия этилган талабгорларнинг ҳужжатлари ўрнатилган тартибда Жамғарма Кузатув кенгашида кўриб чиқиш учун тақдим этилади.

25. Жамғарма Кузатув кенгашининг танловдан муваффақиятли ўтган ва стипендияга тавсия этилганларнинг рўйхати Институтга стипендияни тўлаб бериш учун тақдим этилади.

6-боб. Яқунловчи қоидалар

26. Стипендиатлар бўйича таълим олаётган ташкилотнинг ички тартиб қоидаларини бузганлиги ёки илмий фаолиятида сусткашликка йўл қўйганлиги тўғрисидаги тақдимномасига кўра, Жамғарма Кузатув кенгаши қарори билан стипендия берилиши тўхтатилади.

27. Танловда қатнашган талабгорларнинг ариза ва шикоятлари қонун ҳужжатларида белгиланган тартибда кўриб чиқилади.

28. Танловда қатнашиш учун киритилган материаллар қайтариб берилмайди.